

Te Heheuraa Api

E ITE IĀ OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 faranō i te matahiti.

Nº 8

-- ATETE 1951 --

MAT. 38.

Te Raturaa I To Tatou Oraraa.

TE tino o te taata nei o te ohipa hanahana a'e ia a te Atua. I roto i te pene matamua no te Genese te haapiihia mai nei i huru no te hamaniraa hia o teie nei ao. I roto i na mahana e pae ra ua hamani te Atua i teie nei ao, e i te ono o te mahana na faaoti oia i ta'na ohipa rahi, oia hoi, te hamaniraa ia te taata nei. *Genese 1:26-27.*

Ua hinaaro anei tatou ia riro ei taata nehenehe? Mai te mea e, ua roaa mai ia tatou i te hoê poe rahi, e poe pape maitai e te nehenehe roa, e poe hau roa i te nehenehe, eaha to tatou haapaoraa i taua poe ra? e haapao ore anei tatou i taua poe ra? e tuu anei tatou i te pape auahi i nia ia'na, e e tapu anei tatou ia'na i te tipi, e aore ra e tupai anei tatou i taua poe i te hamara? Eita roa tatou e na reira, e faahere-

here ra tatou i taua tao'a ia ore ia hamani inohia e ia vai noa oia mai to'na huru mau.

To tatou tino nei, tei horoa hia mai ia tatou e te Atua, uâ hau roa'e i te nehenehe i tera poe e te mau mea atoa i roto i teie nei ao. To tatou tino o te fare ia no to tatou Varua i roto i teie nei ao, e i roto i taua fare ra te vai nei te mau huru machine nehenehe, e mau machine te ore roa eoti i te taata ia hamani, hoê noa iho taata te ite i te hamani i taua machine ra o te Atua ana'e, e tao'a rahi roa teie tino nei ia feruri tatou i to'na huru. e haamana'o atoa tatou ia ino te hoê vahi o teie tino, ia ino te hoê mau mea no taua machine ra eita e tia ia tatou ia hoo faahou mai i te mea apî, ia ino ta tatou mori, oia hoi, to tatou mata, aita e ravea ia hoo mai i te mea apî. Ua horoa hia ia tatou e piti mata, tirara ia, ia ino te reira eita tatou e ite faahou i to tatou purumu.

No reira teie te uiraa, te haapao nei anei tatou i teie tao'a rahi, teie tao'a tei ore e tia i te taata ia hoo, oia hoi to tatou tino, te imi nei anei tatou i te mau ravea atoa ia vai noa oia mai to'na huru mau? A haere tatou e farerei tatou ia tatou iho, a haere tatou i mua i te hoê hi'o rahi ia farerei to tatou mata i to tatou iho mata, e aha to tatou huru? e taata ivi roa anei tatou no te haapao ore raa i ta tatou maa, e no te rahiraa o te ava e te avaava tei haere i roto ia tatou e te haere nei to tatou na mata i te pouri no te rahiraa o te mau mea taero ta tatou i faatia ia haere i roto i to tatou tino? Te haamata nei anei to tatou mau machine i te paruparu no te mea aita tatou i tahinu e e horoi e e tuu i te mau mea e au i roto ia tatou? E aore ra te hi'o nei tatou i te hoê taata nehenehe e te tino rahi e te itoitoe, to'na nau mata e mea papu maitai e te hoê tino tei i roa i te puai e te hinaaro i te rave i te ohipa. E mea papu ua hinaaro tatou ia riro mai teie

taata hopea oia hoi ei taata nehenehe. E teie te uiraa, eaha ta tatou ravea ia riro tatou mai teie taata te huru? *Buka, Fafau 88:124.* Na teie mau parau i muri nei e haapii mai ia tatou i te ravea ia riro tatou mai taua taata ra.

Maa No Te Tino. I te matahiti 1833, e toru matahiti i muri a'e i te faatia raa i te Ekalesia a Iesu Masia i Te Feia Mo'a i Te Mau Mahana Hopea Nei, ua horoa te Atua, ia Iosepha Semita i te hoê Heheuraa, tei parau hia Te Parau Paari ia riro ei aveia no te mau melo no te Ekalesia. *Buka Fafau 89:2.*

Ua faaite mai teie Heheuraa i te mau mea e au no te tino o te taata nei e te mau mea te ore e au i te tino o te taata nei.

Te Mau Haapiiraa e te Heheuraa. Na ô mai ra te Atua ia Iosepha i te taime ta'na i horoa i teie Heheuraa. *Buka Fafau 1:24.*

"Inaha, o vau hoi te Atua, e ua parauhia e au, na'u teie nei mau faaueraa, e na horoahia atu i ta'u mau tavini i to ratou paruparu ra, na roto i to ratou ra reo, ia noaa ia ratou te ite." *Buka Fafau 1:24.*

A Hiopoa tatou i teie mau parau ia ite tatou i to ratou huru.

1. Eiaha e Inu i Te Ava. Te mau huru uaina e te mau huru ava e mea ino ia. "E mai te mea ia inu te hoê taata no roto ia outou na i te uaina, e te mau ava taero, inaha e ere ia i te mea tia, e ere atoa i te mea au i mua i te aro o to outou ra Metua." *Buka Fafau 89:5.*

Ua ite tatou i te huru o te taata tei taerohia e te ava. Eita e tia ia'na ia haere mai te afaro; e tauene noa ta'na tino mai te hoê haari teitei, i roto i te mata'i rahi; to'na na mata,

ua huru ê ia eita oia e ite maitai; to'na arero, e mea etaeta, mai te mea ra ua nirahia, e ua riro to'na feruriraa mai to te tamarii te huru, e aita oia e haapao faahou i to'na tino, ua riro oia ei taata hupehupe roa. Eaha te tumu no te huru ê raa o te tino o te taata inu ava? Teie ia, te tuu nei oia i te mau mea au ore i roto i to'na machine e aita e nehenehe ite machine ia faariro i teie mau mea ei maa ora, no te mea e maa taero e maa pohe te reira, e ia tae teie huru maa pohe i roto i te machine ora, e haapohe hia te tahi mau mea orai roto, e te hopea e paruparu te machine e e hupehupe te taata, e ia inu noa teie taata i te ava e pohe roa oia. Eaha te tumu aita te Hau e hinaaro i te taata inu ava ei taata rave ohipa? no te mea eita e tia i te Hau ia tiaturi i nia ia'na, ia horoahia te hoê ohipa fifi ia'na e oti paha e aita paha, no te mea e mea paruparu to'na feruriraa. Eita te Hau e te mau sotaiete e horoa i te pahi reva i roto i te rima o te taata inu ava, no te mea tei faatere i te pahi reva, e mea tia ia papu maitai to'na feruriraa e ia araara maitai to'na mata e ia itoitro roa to'na tino, ia tupu te peapea i te reva, ua ite te taata faatere i te mau ravea ia ore ia pohe te mau taata inia i te pahi-reva, e ia parari atoa hoi te pahi. Eita te mau sotaiete rahi e rave i te taata inu ava ei raatira no to ratou mau pahi, no te mea e moni rahi roa no teie pahi e ua rahi te taata te tere nania, e e rahihoi te taihaa te afaihia, ua ite ratou e ia roohia te pahi i tua e te matai e te miti rahi, eita te mau mataro e faatura i to ratou raatia, mai te mea ua taero oia. E aita atoa te raatira tei taero i te ava e ite i te mau ravea e ora'i te mau horapatete e ia tae atu te pahi i te femua i mana'ohia. E tera ia te huru i te mau vahi atoa i roto i teie nei ao, ia hinaaro tatou ia riro ei taata rahi i roto i te mau ohipa rahi no teie nei ao, eita e tia ia inu i te ava. Te taata tei hinaarohia e to teie nei ao, o te taata e feruriraa

papu, e te mata araara to'na, te taata tei haapao maitai i ta'na mau machine, te taata tei tuu i te mau maa-ora i roto, e ia roohia to'na pahi i te ati e ia parau oia, e haapao te man mataro i ta'na faaueraa, ua hinaarohia te taata e roo maitai to'na.

2. Eiaha E Puhipuhi i Te Avaava. "E teie â hoi, e ere te avaava i to te tino, e ere atoa hoi i to te opu, e ere hoi i te mea maitai na te taata, ei raau rii râ no te mau pepe, e ua te puaatoro i pohe i te ma'i hoi, ia au ra te raveraa-hia mai te ite e te paari." *Buka Fafau 89:8.*

Na ô mai ra te Atua, e raau te avaava no te mau puaatoro i pohe i te ma'i, mai te mea e, ia au te raveraa-hia, ia ore ra e tia te raveraa-hia e mea papu e, e raau taero roa te reira, no reira ia parau mai te Atua ia oe e, a rave oe i teie raau e faamu oe i ta oe puaatoro pohe i te ma'i, eiaha ra e faarahi, no te mea, e raau taero e e pohe te puaatoro, e amu anei oe i teie raau? Ia faaite mai te hoê taote rahi ia'oe; tei roto i te hoê mohina te hoê raau taero roa, e haere ia oe e inu i tera raau? te na reira nei te taata o te puhipuhi nei i te avaava.

Eaha te hopea o te taata apî tei ore i mâtan i te hopu, e tei haere i te vahi hohonu e hopu ai? eaha te hopea o te taata tei faatere i to'na pahi i tua ma te machine ore e te ie motumotu? eaha te hopea o te taata o te faahoro i to'na pereoo na te purumu i te po, aita to'na e mori? Teie te pahonora no teie mau uiraa; O te pohe ia. Ua hinaaro te Atua ia tauturu mai ia tatou i te taime i faaite mai ai Oia e, e mea taero tera raau, e e faarii anei tatou i ta'na parau, e aore ra, e tamata tatou ia taerohia e ia paruparu to tatou mau machine ei reira e ani atu ai i te Atua ia tauturu mai ia tatou.

E Mea Tero Te Avaava. Tei roto i te avaava te hoê taero parauhia "nicotine." E e taero puai roa te reira. I te taima e iritihia mai oia no roto mai i te avaava, mai te pape to'na huru, ia huru maoro ra i rape i te vahi maramarama e riro oia ei mea rehurehu. E mai te au i tei faaitohia mai e te mau taote rahi, e navai e piti e aore ra e torn topata o teie taero, tei iriti hia mai no roto i te avaava, no te haa oheite hoê taata mai te mea e inu oia i te reira mau topata i te taima hoê,

Te na ô maira te taote ra o Dr. Oaks. Te hoê ia taote rahi no teie nei ao. "E mea ino roa te avaava, e faaino oia i te mafatu, te nahaha, te mau uaua pamu raa toto, te mata e te feruri raa o te taata tei puhipuhi ia'na." Ua faaite atoa mai oia e, "i rotopu o te hanere o te mau taureare, mai te ahuru e tae noa'tu i te ahuru mahitu o te matahiti, tei tae i mua i te aro o te haava, i te oire ra o New, York, no te rave raa i te hoê hara, ua noaa e iva ahuru e maiva tei puhipuhi i te avaava."

3. E Mea Ino Te Taofe E Te Ti. "E teie â hoi, e ere te mau inuraa veavea i to te tino e i to te opu, "*Buka Fafau* 89:9. Ia inu tatou i te taofe e te ti, e inu tatou i te reira i te taima te vai veavea noa ra e, e mea ino te reira no te opu. Te vai atoa ra te taero i roto i te taofe e te ti, tei parauhia te *tannin* e te *cafféin*, e mea taero roa teie na mea e piti, e ia haere noa teie taero i roto i te opu e paruparu te mau melo no te tino.

A feruri tatou, i nia i teie mau mea au ore, e faufaa hia anei to tatou mau tino i te hoê vahi iti a'e, ia tuuhia teie mau mea taero i roto ia'na? E hoê noa iho pahono raa, aita roa ia. E pau anei to tatou moni i te hoo raa mai i teie mau mea? te pahonora. E! no reira. ia ite tatou e, te auu

nei tatou i te hoê mea, e eita to tatou mau tino e faufaahia na roto i te amuraa i taua mea ra e e pau atoa ta tatou moni i te hoo raa mai i te reira mau mea, e mea tia ia faatupu tatou i te feruriraa, i roto ia tatou iho, ia faarue i teie mau peu ino.

Te ite ore o te taata i te Basileia o te Atua.

E matana ra outou i te imi i te Basileia e te parau tia nana ra e amui hia mai taua mau mea ra ia outou."

Te vai ite ore noa nei â te mau taata ite Basileia mau o te Atua. Te tia turi noa nei te tahi pae ite Ekalesia i tiaturu hia e to ratou mau metua, tiaturu noa atoa atura te mau tamarii e te mau mootua e tae noa'tu i te mau hina rii, e ere ra e na roto i to ratou ite papu e o te Ekalesia mau te reira. Aita'tu ta ratou e feruriraa maori ra faaea noa ratou i reira mate imi ore i te parau mau.

No reira eiaha e faaea noa.

E tau hororaa teie e tau imiraa ia roa'a te Basileia o te Atua, ia amui hia mai te mau mea atoa.

Ua ite tatou i roto i te Bibilia e ua tuu Iesu i te mau toroa e rave rahi i roto i ta'na Ekalesia i te matamua. No te aha ia te mau Ekalesia i parau e na Iesu ratou i ore ai i tuu ai i teie mau toroa i roto i taua mau Ekalesia ra? maori ra na roto i to ratou ite ore i to te Atua mau hinaaro, no te

mea aita te Atua e parau mai ia ratou. Faatupu noa'tura ratou i te mau Ekalesia mai te au i to ratou iho hinaaro a parau ai e teie te Ekalesia mau a te Atua. Ahi'o na tatou i te huru no te Ekalesia mau a te Atua, e ua fâ atu te Atua iho ia Iotepha Semita mate faaite atu i to'na mau hinaaro e ta'na opua raa ite tamarii a te taata nei, e ua horoa'tu i te mau mana atoa e hope roa'e. Ua faaite mai Oia i te mau huru e te faatere raa i au ite Ekalesia ta Iesu iho i faatia i to'na tau. Na roto i te mana o te autahuaraa tei horoa hia mai ia'na, e na roto i te faaue raa a te Fatu ua tia roa to Iotepha Semita faatia raa i te Ekalesia.

E ua maiti oia i te tahi pae
 ei Apotetoro Luka 6:13-16,
 ei Peropheta I Korinetia 12:28-29,
 ei Haapii Evanêlia Epohetia 4:11-12,
 ei Tahua rahi Hebera 3:1,
 ei Hituahuru Luka 19:1,
 ei Beretibutero Ohipa 14:23,
 ei Epitetopo Philipi 1:1,
 ei Tahu'a Luka 1:5,
 ei Haapii Roma 12:2,
 e ei Tiatono Philipi 1:1,

E ua haamau i te Bapetizo raa faahopu mai te Iesu i parau atu ia Nikotemo i roto i te Ioane 3:5.

“Ia ore te taata ia fanau i te pape e te varua e ore roa oia e ô i te Basileia.” Ua faaite atoa mai Iesu ia mairi hia To'na Io'a i nia iho i Ta'na Ekalesia e tia; ahi'o Buka Moromona III Nephi 27:5-8. *Te naô maira te reo mau no Iesu: “Aita anei ratou i taio i te parau i papaihia ra, te*

noô mai nei e,, *Ia rave outou i te io'a o te Mesia e tiaï, o tou ia io'a.* “*Tei taua io'a nei outou e parau hia'i i te mahana hopea ra: 6 E te rave i To'u ra io'a i nia iho ia'na, e te tumau e tae atu i te hopea ra e ora ia. 7 E te nana te mau mea atoa ta outou e rave, na outou ia e rave i tou ra io'a, no reira e parau hia'i te Ekalesia i to'u ra io'a, e epure atu outou i te Metua i to'u io'a ia haamaitai oia i te Ekalesia nou ra: 8 Na hea ia te Ekalesia mau ia ore ia parau hia i to'u io'a? Ia parau hia hoi te Ekalesia i te io'a no Mose ua riro ia ei Ekalesia na Mose, ia parau hia hoi i te io'a o te taata, ua riro ia ei Ekalesia na taua taata ra. Ia parau hia ra i to'u ra io'a e ia patu mau hia i nia i tau ra Evanelia, e Ekalesia ia nau i reira.*”

Na teie man faaite raa a te Bibilia e te Buka a Moromona i haapapu mai ia tatou e, o teie ia te Basileia man o to tatou Atua o te “*Ekalesia a Iesu Mesia i te Feia Mo'a i te Mau Mahana Hopea Nei.*” E tei reira te Evanelia mau a Iesu Mesia i te vairaa, e o Iotepha Semita ra e Peropheta mau ia na te Atua.

E no te reira te parau atu nei au ia outou e tou mau hoa, ahaere ana'e mai i roto i te ovine o to tatou Atua ia amu tatou i te hotu no te Raau ora.

Papai hia G. Tu Keha a Menemene

EDITORIAL

UA tuuhia mai te Evanelia, no te taima hopea e aita oia e rave faahouhia no nia i teie nei ao. E tia ia porohia te reira e e porohia te reira i te mau nunaa atoa, e te vai nei te tauatiniraa o te taata te faarii ia'na e to'na ho-

pea o te upootiarāa ia. Noa'tu e e faahope mai te mau māna o te pō i to ratou puai, e haere noa te ohipa a te Atua i mua e tae noa'tu i to'na faahope roa rā hia. No reira eita e tia, i te Feia Mo'a no te mau Mahana hopea nei, ia haapeapea ia ratou no te huru o te Ekalesia i te mau tau a muri atu, i te mau fenua atoa.

E papu anei ia tatou i te huru, a muri atu, no te mau melo no te Ekalesia? Te faahema, tei ore i faaea noa. te aratai noa nei oia i te paruparu i te hara, e te hopea o te rahirāa o tei faahemahia o'te haama ia e te pohe. Area ra e tia i te mau taata atoa ia faaitoito e ia upootia i nia i te ino, no reira e tia i te mau taata atoa ia faarave, i to'na puai e to'na hinaaro, i te ohipa e ia pure tia ia'na ia haere ma te afaro i mua i te Atua. Te reira ia te mau mea i titaubhia no te faaineineraa i te hoê hopea maitai no tatou.

E tia i te mau melo atoa no te Ekalesia, noa'tu i te vahi, ia imi i te ravea ia noa ia'na te mana'o e te aau mitinare, e ia rave i nia ia'na iho, te mau ohipa o te mitinare. E tia ia vai i roto i te Feia Mo'a mau no te Mau Mahana Hopea nei, te hinaaro ia aratai mai te mau taata atoa, e tei hau roa'tu te mau taata tei matau roa hia e ratou, ia ite i te mea faufaa roa ta'na i ite, oia hoi te Evanelia a te Mesia. E tia i te melo no te Ekalesia, ia ite, mai te mea e imi oia, i te mau, ravea i roto i to'na orarāa i te mau mahaua'toa ia haapii atu i te Evanelia ia vetahi ê, e te vai nei te milioni rāa o te taata o te hiaai noa nei i te Evanelia ma te ite ore, e tei roto i to tatou mau rima te ravea ia faarahi i te melo i roto i te Ekalesia.

O te ravea rahi faaora o te Evanelia nei, o te aroha ia. E tia ia vai, ma te papu mau, te aitahoê rāa e te hau i roto i te mau melo no te Ekalesia, no te mea o taua mau ho-

tu ra, o te Evanelia, tei hau roa'tu i te hiohia mai te mea ra ê no ô mai i te Atua ra, e te mau taata êê, i te mau ture atoa o te Evanelia. Mai te mea te au nei to tatou oraraa i te mau faaueraa a te Ekalesia, e rave rahi te tauatini o te mau taata te pee mai e te faarii mai ia'na, o te reira hoi te hoê ravea ia haamanuia i te ohipa no te tau a muri atu.

Teie te mea rahi tei faataa ê roa i te Ekalesia i te tahi atu mau Ekalesia, na'na iho oia e faatere. I roto i teie nei Ekalesia aita te Autahu'araa i faarirohia ei pûpû taa ê, no te mea e tia i te mau melo tane atoa ia faarii i te Autahu'araa, maori ra te huaai o Kaina oia hoi te taata ereere, aita e pûpû taa ê i roto i te Ekalesia no te mea e tia i te mau melo atoa, te tane e te vahine tei haapao maitai, ia riro ei taata faatere. E tia i te mau amaa atoa ia titau e ia riro to'na mau melo ei faatere ia'na iho, te tane e te vahine, na reira e tia i te mau melo atoa ia faaineine ia ratou iho, no te mea te vai ra te tau, e anihia paha ratou ia faatere i te ohipa i roto i to ratou amaa. No reira, teie te hoê haapiiraa tumu na te Ekalesia ia haapao te taata ia'na iho, no te mea o te taata tei matau i te tiaturi ia vatahi ê eita oia e etaeta, e paruparu ra. E mea huru maitai a'e ia amu i ta oe iho faraoa, ma te haehaa, i te haere e amu i te maa i roto i te mau tamaaraa tei faatupuhia e te aroha a vetahi ê. Ia aufau maite hia e te taata te tufaa ahuru e te tahi atu â mau moni tanturu, ei faaruperupe raa i te amaa, e ia ravehia taua ohipa ra ma te afaro i mua i te aro o te Atua. te tumu o te mau maitai atoa. E vai noa ia to'na Varua i rotopu i te mau taata no te haamaitai, tanturu e te faaitoito ia ratou iho. O te haapao maitairaa ia'na iho, o te niu rahi no te paturaa i te mau ohipa no te tau a muri atu.

Teravea faaora, no te feia i pohe, mai te mea e ravehia ma ta papu i te imiraa i te mau parau tuatapapa, e horoa mai ia tatou i te mau tau a muri'atu, te tautururaa e te haamauruuru raa o te mau varua e rave rahi i te ao a muri atu. I roto i te reira tautururaa e oti to tatou mau hiaai atoa.

E tia ia riro te Feia Mo'a no te Mau Mahana Hopea nei, mai te hoê utu'afare tei i te aroha, tei faaroo e tei haapao maitai i te mau ture atoa tei faataa ê hia na e to tatou Metua i nia i te Rai. E faariro hia, te au taeae raa e te varua tauturu i te Ekalesia a te Mesia ei mea nounouhia e te mau tamarii a te taata nei.

E au mau taeae, te parau atu nei au e, ia rahi noa'tu to tatou faaturaraa i te Autahu'araa, tei horoahia ia tatou, e haere iboa te ohipa a to outou mau amaa i mua, no te mea tei roto i te Autahu'araa te mana faatere, e o outou te feia faatere i roto i te Ekalesia, o outou ia te faarii i te utua no te faatereraa tei tuuhia i nia ia outou, mai te mea te tia nei outou i te hoê mea no te tau a muri atu.

Eaha te noaa ia tatou i te tau a muri'atu? E rahi roa'tu paha ia i to tatou huru, i teie nei, mai te mea e haapao tatou i teie nei mau mea rii: E upootia i nia i te ino; faarahi i te varua poro Evanelia, faahotu i te varua aroha i rotopu i te mau melo no te Ekalesia, faaineine i te mau Amaa ia faatere ia ratou iho, e ia tauturu te tahi Amaa i te tahi amaa, faarave maitai i te mau ohipa o te Ekalesia, a imi i to tatou mau tupuna i pohe, faatupu te here i rotopu i te mau utuafare no te Amaa e ia faaitoito te Autahu'araa ia'na iho ia tia ia ratou ia tae i te vahi e au no te feia tei faataahia no te faatere i roto i te haehaa.

Eaha te noaa ia tatou i te tau a muri atu? E noaa mai ia te mea ta tatou iho e hinaaro, no te mea ua horoahia

mai ia tatou, te mana no roto mai i te Evanelia ia faaoti i te mau ohipa atoa no te haere raa i mua i roto i te opunaraa a Tei faanehenehe i te ravea ora.

Na Huru E Piti Nei.

E Piti ia huru roto-pape e vai nei i te fenua Ierusalem e i te fenua Utaha atoa hoi.

Te hoê ra, e roto-pape ora maitai ia. E mea mitimiti ore ia. Te tahi, e roto-pape miti pohe ia.

E mea tia ia tatou ia hiopoa maitai i te huru o na roto-pape e piti ra.

Te roto-pape matamua ra, e mea tauturu rahi roa ia i te taata ra i to'na oraraa nei, no te mea, te horoa nei ia roto i te pape maitai e au ia inuhia. Tei roto hoi i taua roto-pape ra, te mau huru i'a e rave rahi, ei maa na te taata nei. Te haere noa nei te mau taata e rave rahi i taua roto-pape ra i te ravaai. Roaa mai ihora ia ratou ra, te tahi man i'a ei maa. Te roto-pape i Ierusalem e parauhia nei o Galilea ia, to'na io'a, e te tahi i Utaha, ua parauhia ia te roto-pape Utaha.

Te aratai faatahe nei te mau taata i taua pape maitai ra i nia i te mau fenua păpă-mărô ra, e riro ihora ia fenua i te faahotu mai i te mau huru huero e te mau huru hotu maitatai atoa ra. Na taua pape ora i faariro i te fenua medebara ei fenua ruperupe e te nehenehe. No te mea, e ora to roto i taua pape ra, i riro ai ia ei haamaitairaa rahi roa i to te fenua nei. E aroha to roto i teie nei pape, e te horoa noa

nei ĩa aroha i te mau mahana atoa ra, o te mea ĩa i maitai ai.

Te roto pape piti ra, ua parauhia ĩa te Roto Miti i te fenua Utaha nei, e i te fenua Ierusalema, ua parauhia taua huru roto-pape ra te Miti pohe.

Aita ĩa huru pape e maitai ia inu. Aita hoi ĩa e au no te faaapu, e pohe te mau huru raau e te mau hotu i te reira, e ia tuuhia te i'a i roto i taua pape miti ra e pohe roa ihora ĩa.

Aore roa e ora o roto i taua pape miti ra, area ra, e pohe to reira. Aita e faufaa i te taata nei, e aita hoi ĩa e faufaa i te mau puaa e te mau manu o te reva ra. E mea pohe iho â ĩa.

Eaha te mea i riro ai ĩa ei miti pohe? O teie ĩa, oia hoi, te faarii noa nei ĩa roto-pape i te mau anapape rii maitai, o tei tahe mai, mai nia mai i te mau mou'a ra, e te faarii atoa nei ĩa roto-pape i te ua, no nia mai i te ra'i. Tera râ, te tapea nounou nei râ ĩa roto-pape i taua mau mea maitai ra, ma te horoa-ore i te tahi tufaa iti nainai na te taata e na te mau puaa e na te fenua păpă mărô ra. E no reira, ua rahi te miti i roto i taua pape ra, riro ihora ĩa ei mea vari roa e te faufaa ore.

E piti ĩa huru taata i te ao nei, i te matamua ra, o te taata aau aroha ĩa. E te piti ra, o te taata aau nounou ĩa.

Te faarii noa nei na huru taata e piti ra, i te mau ha-maitairaa e rave rahi, no ô mai i te Atua ra. Te tapea nei te tahi, i taua mau haamaitairaa ra na'na iho. Te i roa nei to'na aau i te feii e i te nounou e i te haru, e i te piri taoa, e i te horoa ino, e i te rima puu, e i te aroha ia'na iho, e i te haapaoraa ia'na iho ana'e ra, e i te haamaua'o ore i te Fatu. Aita ia huru taata e anaanatae i te poipoi ra, a hi'o

atu ai oia ra i te hitiraa o te râ. Aita oia e haamaitai i te Atua no te ora, e no te maa, e no te pape-inu e no te tino ma'i ore, ta te Fatu i horoa mai na'na i te mau mahana atoa ra. E nounou râ to'na na'na iho te maa e te fenua e te tao'a atoa hoi o ta'na ra taata tupu. Aore to'na e aroha i te taata veve e i te taata pohe i te ma'i, e i te feia paruparu, e i te vahine ivi, ei te Ekalesia ra. Te tapiri nei oia i te mau mea atoa ra na'na iho. Hoê â ia huru to'na e i to te Miti pohe ra. E tavini mau ia oia no Satane, e e tavini mau ia oia no te pohe.

E te tahi huru taata, eaha ia to'na huru ra. E aau maru aroha to'na. E himene haamaitai hoi to'na i roto i to'na ra aau i te mau mahana atoa ra. Te haamaitai nei oia i te Fatu no te mau maa aroha ta'na i faarii i te mau mahana atoa ra, oia hoi no te ora e no te maramarama, e no te hitiraa o te râ, e no te maru o te pô, e no te taatoaraa, e no te araraa i te poipoi ra, e no te maa, e te pape. Eua maururu roa oia no ta'na ohipa i rave e no to'na taata tupu, e no te mau taihaa e te tao'a ta te Fatu i horoa mai na'na, e mea iti noa'tu.

E feia pohe i te ma'i i ô ia'na ra, ua na mua oia i te tauturu raa atu ia ratou ra. E e feia veve to'na taata tupu, ua namua oia i te tauturu atu i te maa e teahu. E e feia pohe i te ma'i i ô ia'na ra, te haamaitai atu nei ia oia ia ratou ra.

Hoê ana'e ia huru to taua taata maitai ra, e i to te roto-pape ora maitai ra. E aroha, e e ora hoi o roto ia rana ra. E tavini mau ia huru taata no te Fatu. Te haapao nei ia taata i na ture e piti, i parauhia e Iesu, oia hoi. "E hinaaro oe i to Atua ia Iehova ma to aau atoa, e ma to varua atoa, e ma to mana'o atoa. O te ture matamua teie tei hau i te rahi. E mai te reira atoa te piti; E aroha atu oe i to taata-tupu, mai to aroha ia oe iho na. Te ture atoa a te mau peropheta, tei teie nei pue ture e piti nei." Mataio 22:40.

No roto mai i te buka Roma, te papu mai nei ia tatou

i te tahi atu â parau no te aroha. Te na ô maira te Aposetolo e, "Eiaha outou ei amu tarahu na te taata atoa, area ia aroha'tu te tahi i te tahi, o tei aroha'tu hoi ia vetahi ê ra, ua haapao ia i te ture. O teie hoi e, eiaha oe e faatari, Eiaha oe e eiâ, Eiaha oe e haavare, Eiaha oe e nounou, e te vai nei te tahi ture, ua hope atoa ia i roto i teie nei parau e, E aroha atu oe i to taata-tupu mai to aroha ia oe iho na. E ore roa te aroha e haamani ino i te taata tupu; te au ra matori te aroha i te ture. Ua poto roa te rui, ua faatata roa te ao; e teie nei e haapae atu tatou i te mau ohipa o te pouri, e ahu tatou i te ahu o te ao. Ei haerea nehenehe to tatou mai te haerea ao ra, eiaha ma te poiri ra, e te faataero ra, eiaha te parau faufau, e te taiata ra, eiaha te mârô e te fei ra. E tuu râ outou i ta te Fatu ra ta Iesu Mesia i nia iho ia outou, e eiaha e faaitoito i ta te tino hinaaro." Roma 1:8-14.

Ia i roa to tatou nei mau aau i te aroha i te Fatu, e i te aroha atu i to tatou nei taata-tupu, o te hinaaro mau ia o to taeae i te faaroo nei.

Te Revaraa

Te faaitohia'tu nei i te huru o te revaraa'tu o to tatou mau hoa orometua. i te 6 no Tiunu 1951. Toomaha ratou i te reira ho'iraa'tu i Amerika, O Bob Mc Clellan raua o Carol Gene Mc Cellan e to raua aia, e o Bernard Laresona atoa hoi. Aita â i pau te tau tei faataahia no to Bob raua Carol Gene faaearea i teie paeau, ua ho'i atu râ raua na roto i te ati. Oia hoi, ua noaa i to raua aia i te avae paruparu, o tei parau hia Polio. E ma'i ino roa teie, e no reira ua faaho'ihia ratou e te peropheta. E rave rahi te mau hoa tei aroha'tu ia ratou i taua revaraa ra, e ua riro te reira ei revaraa hanahana. Te mauruuru roa nei to te mitione paatoa ia ratou no: e ohipa rahi ta ratou i rave i to ratou faaearea i rotopu ia tatou i teie paeau Oceania nei. Tei Papeete te rahiraa o te ohipa na Bob raua o Carol Gene; ua tere râ Laresona i te mau fenua ra, i Takaroa, Takapoto, e i Tubuai. Te faaitohia nei te pa rau rii api na roto i te tiaturiraa ia tere ratou i nia i te e'a moana ma te hau e ma te paruru o te Atua ra.

IA ORA NA.